



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՈՐՈՇՈՒՄ N 01/2023

ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՋՆԵՐԻ ԱՌԵՐԵՎՈՒՅԹ ԽԱԽՏՄԱՆ ՎԵՐԱԲԵՐՅԱԼ ՎԱՐՈՒՅԹ ՀԱՐՈՒՑԵԼՈՒ ՄԱՍԻՆ

ք. Երևան

13 մարտի 2023 թվական

Կոռուպցիայի կանխարգելման հանձնաժողովը, կազմով՝ Հ. Հարությունյանի, Ն. Համբարձումյանի, Մ. Գալստյանի և Լ. Ալեքսանյանի, (այսուհետ՝ Հանձնաժողով), ուսումնասիրելով Ազգային ժողովի պատգամավորների անհամատեղելիության պահանջների պահպանման ստուգման շրջանակում իրականացված **08/2022** վարույթի արդյունքում ձեռք բերված տվյալները,

Պարզեց

Հանձնաժողովը, հիմք ընդունելով «Կոռուպցիայի կանխարգելման հանձնաժողովի մասին» օրենքի 23-րդ հոդվածի 1-ին մասի 1-ին կետը և նույն օրենքի 27-րդ հոդվածի 1-ին մասի 3-րդ կետը, և ուսումնասիրելով Հանձնաժողովի կողմից 2022 թվականի նոյեմբերի 30-ին հարուցված թիվ 08/2022 վարույթի իրականացման շրջանակներում ձեռք բերված տվյալները, արձանագրել է հետևյալը.

1. Արմեն Չարչյանը ստանձնել է Ազգային ժողովի պատգամավորի պաշտոնը **2021 թվականի օգոստոսի 2-ին:**

2. Հանձնաժողովի կողմից անհամատեղելիության պահանջների առերևույթ խախտման վերաբերյալ թիվ 08/2022 վարույթի իրականացման շրջանակներում

Պետական եկամուտների կոմիտեի 2023 թվականի հունվարի 24-ի թիվ Մ-333-2023 գրությամբ տրամադրված տեղեկատվության համաձայն՝ Արմեն Չարչյանը 2021 թվականի օգոստոսից մինչև 2022 թվականի դեկտեմբերն ընկած ժամանակահատվածում ստացել է աշխատավարձ և դրան հավասարեցված այլ վճարումներ Երևանի Մխիթար Հերացու անվան պետական բժշկական համալսարանից: Նշվածի ուսումնասիրությամբ Հանձնաժողովի կողմից «Էկենգ» ՓԲԸ փոխգործելիության հարթակի միջոցով Պետական եկամուտների կոմիտեի առցանց հարթակից ձեռք են բերվել տվյալներ առ այն, որ Արմեն Չարչյանը 1992 թվականի մարտի 21-ից զբաղեցնում է Երևանի Մխիթար Հերացու անվան պետական բժշկական համալսարանում ամբիոնի վարիչի պաշտոն:

3. Հանձնաժողովի կողմից անհամատեղելիության պահանջների առերևույթ խախտման վերաբերյալ թիվ 08/2022 վարույթի իրականացման շրջանակներում Պետական եկամուտների կոմիտեի 2023 թվականի հունվարի 24-ի թիվ Մ-333-2023 գրությամբ տրամադրված տեղեկատվության համաձայն՝ Արմեն Չարչյանը 2022 թվականի մայիսից մինչև նոյեմբեր ամիսն ընկած ժամանակահատվածում ստացել է աշխատանքային վարձատրություն քաղաքացիաիրավական պայմանագրով «Իզմիրյան» բժշկական կենտրոնից:

Հայաստանի Հանրապետության Սահմանադրության 95-րդ հոդվածի համաձայն՝ **պատգամավորը չի կարող** զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, զբաղվել ձեռնարկատիրական գործունեությամբ, **կատարել վճարովի այլ աշխատանք, բացի գիտական, կրթական և սրբազորական աշխատանքից:**

«Հայաստանի Հանրապետության Ազգային ժողովի պարգամավորի գործունեության երաշխիքների մասին» օրենքի 2-րդ հոդվածի 1-ին և 2-րդ մասերի համաձայն.

«1. Սահմանադրության 95-րդ հոդվածին համապատասխան՝ պատգամավորը չի կարող զբաղեցնել իր կարգավիճակով չպայմանավորված պաշտոն պետական կամ

տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, զբաղվել ձեռնարկատիրական գործունեությամբ, **կարարել վճարովի այլ աշխատանք, բացի գիտական, կրթական և սպեղծագործական աշխատանքից:**

2. Պատգամավորական մանդատն ստանալուց հետո՝ **մեկ ամսվա ընթացքում, պատգամավորը պարտավոր է՝**

- 1) դուրս գալ անհատ ձեռնարկատիրոջ պետական հաշվառումից,
- 2) ազատվել առևտրային կազմակերպություններում զբաղեցրած պաշտոնից,
- 3) դուրս գալ առևտրային կազմակերպություններից կամ դրանց կանոնադրական կապիտալում իր բաժնեմասն ամբողջությամբ հանձնել հավատարմագրային կառավարման,
- 4) հրաժարվել առևտրային կազմակերպությունում ուրիշի գույքի հավատարմագրային կառավարումից,
- 5) ազատվել պետական կամ տեղական ինքնակառավարման մարմիններում զբաղեցրած պաշտոններից, բացառությամբ սույն հոդվածի 5-րդ մասում նշված պաշտոնների,

6) ազատվել վճարովի հիմունքներով աշխատանքից, բացառությամբ գիտական, կրթական կամ սպեղծագործական աշխատանքի:»:

Նույն օրենքի 6-րդ հոդվածով սահմանված է նաև, որ «Հայաստանի Հանրապետության Ազգային Ժողովի պատգամավորի գործունեության երաշխիքների մասին» օրենքի իմաստով՝ ձեռնարկատիրական գործունեություն, ինչպես նաև գիտական, կրթական կամ սպեղծագործական աշխատանք է համարվում «**Հանրային ծառայության մասին**» օրենքով սահմանված համապատասխան գործունեությունը կամ աշխատանքը:

«**Հանրային ծառայության մասին**» օրենքի (այսուհետ՝ Օրենք) 4-րդ հոդվածի 2-րդ մասի համաձայն՝ **հանրային պաշտոնը** դասակարգվում է խմբերի՝ **պետական** և համայնքային: Նույն հոդվածի համաձայն՝ պետական պաշտոնները դասակարգվում են տեսակների՝ **քաղաքական**, վարչական, ինքնավար և հայեցողական:

Օրենքի 5-րդ հոդվածի 2-րդ մասի համաձայն՝ Ազգային ժողովի պատգամավորի պաշտոնը հանդիսանում է **պետական քաղաքական պաշտոն**:

Օրենքի 31-րդ հոդվածի 1-ին մասի համաձայն՝ **հանրային պաշտոն զբաղեցնող անձինք** (բացառությամբ համայնքի ավագանու անդամների) և հանրային ծառայողները **չեն կարող** զբաղեցնել իրենց կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, որևէ պաշտոն՝ առևտրային կազմակերպություններում, զբաղվել ձեռնարկատիրական գործունեությամբ, **կատարել վճարովի այլ աշխատանք, բացի գիտական, կրթական և ստեղծագործական աշխատանքից**:

Օրենքի 31-րդ հոդվածի 12-ից 14-րդ մասերով սահմանված են նույն օրենքի իմաստով գիտական, կրթական և ստեղծագործական համարվող աշխատանքների շրջանակները:

Օրենքի 31-րդ հոդվածի հոդվածի 5-րդ մասի համաձայն՝ հանրային պաշտոն զբաղեցնող անձինք և հանրային ծառայողները պաշտոնում **նշանակվելուց (ընտրվելուց) հետո՝ մեկ ամսվա ընթացքում**, պարտավոր են ապահովել սույն հոդվածի 1-ին մասով սահմանված պահանջների կատարումը:

«Կոռուպցիայի կանխարգելման հանձնաժողովի մասին» օրենքի 27-րդ հոդվածի 1-ին մասի 3-րդ կետի համաձայն՝ վարույթ կարող է հարուցվել Հանձնաժողովի նախաձեռնությամբ՝ հայտարարագրերը վերլուծելիս կամ **օրենքով նախատեսված վարույթ իրականացնելիս առերևույթ խախտումներ կամ դեպքեր հայտնաբերելու դեպքում**:

Հաշվի առնելով նշված փաստական հանգամանքները և ղեկավարվելով «Կոռուպցիայի կանխարգելման հանձնաժողովի մասին» օրենքի 27-րդ հոդվածով, 22-րդ հոդվածի 1-ին մասի 2-րդ կետով և 31-րդ հոդվածի 2-րդ մասով, Հանձնաժողովը

Ո Ր Ո Շ Ե Ց

1. Ազգային ժողովի պատգամավոր Արմեն Չարչյանի կողմից անհամատեղելիության պահանջների առերևույթ խախտման հիմքով հարուցել վարույթ:
2. Սույն որոշումը եռօրյա ժամկետում ուղարկել Արմեն Չարչյանին:

ՀԱՆՁՆԱԺՈՂՈՎԻ ՆԱԽԱԳԱՀ



ՀԱՅԿՈՒՀԻ ՀԱՐՈՒԹՅՈՒՆՅԱՆ